


## He Whakatau

Me mātua pānui kia marama rawa koe ki ngā whārangi 8–14 o tēnei pukapuka.

## He whakarāpopoto

Pānuitia te whakarāpopoto ki te ākonga. Ka ki te kurī, “Tukuna ahau.” Mā wai ia e āwhina?



## He kupu whakataki

Kia kaha ki te whakamahi i ngā wheako me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me te āta whakamahi i te papa kupu, whakairo kupu rānei me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Matapakia te whai kurī hei mōkai. Kua whai kurī te ākonga hei mōkai?

Whiriwhiria ngā take me whakarite kia herea ngā kurī.

Matapakia ngā hononga i waenganui i te tangata me ā rātou mōkai.

## He Matapaki

### Tirohia te pai o te pānui a te ākonga

I te wā o te matapaki, me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tataui i ngā hē), te rere o te reo;
- titiro mēnā e marama ana, mā te whai i tētahi o ngā huarahi e whai ake nei;
  - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
  - te pātai mō tētahi āhukatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
  - te whakatenatena i te ākonga ki te titiro ki mua, ki te matapae hoki, i te wā o te whakataki.

### Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini ripene kōrero, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;

- ki te whakaharatau kia eke te ākonga ki tētahi atu taumata.

## He whakapuaki māramatanga

1. He aha ngā kararehe i taha i te kurī?
2. He aha i kore ai ia e tukuna e ērā atu kararehe, koi aha rā ia?
3. Nā wai te kurī i tuku?
4. He aha i tika ai kia tukuna atu te kurī e Rani?
5. Pēhea te hononga i waenganui i a Rani me te kurī?

## Ngā whakautu ki ngā whakapuaki māramatanga

1. He poti (ngeru), he tame pikaokao, he hipi.
2. Koi ngaro, koi mau i te kaihopu kurī, ā, koi kotiti haere ia.
3. Nā te hoa, nā Rani.
4. Ka rerekē ngā whakautu.
5. Ka rerekē ngā whakautu.

## He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhukatanga o te pukapuka nei.

### Te pūtake

**I** He whakaputa whakaaro ki te kaupapa o te pukapuka.

### He whakatakinga ā-roto, he whakaharatau

I mua i te pānui i te pukapuka, whiriwhiria ngā take me here ngā kurī. Tonoa ngā ākonga ki te toko whakaaro ki ngā kare ā-roto pea o ngā kurī ina herea.

Kia oti i te ākonga te pukapuka te pānui, pātaihia ngā ākonga ki te kōrero mō ngā kare ā-roto pea o te kurī i te kore whakaaetanga o ērā atu kararehe ki te tuku i a ia. He aha pea ngā kare ā-roto o te kurī i tōna wetekanga e Rani?

Nā te aha te tangata i ki ai “ko te kurī te tino hoa o te tangata”? Tēnā pea me huri te kōrero kia pēnei, “ko te tangata te tino hoa o te kurī”. He aha ai, he aha i kore ai rānei?

Matapakia ngā ture ā-rohe e hāngai ana ki ngā kurī. E hiahia ana mā te aha? Kei te mōhio te ākonga ki ētahi o aua ture ā-rohe?